

Mud Volapüka

Nüm 13

1 yulul 2016

Rubrig gramatik

Ai

Ladvärb „ai“ jonon das dun u jen jenon valikna, nenpläoto u dulon nenzediko, nenropiko:

men kuratälik kömon lü kobanef **ai** *pötatimo* (*no latikon*) = men kuratälik **valikna** *no latikon* = men kuratälik **nonikna** *latikon*

ston pejedöl **ai** *falon donio* = ston pejedöl kodü vetotanäm tala **nenpläoto** *falon donio*

löfob oli **ai** = löfob oli **ünü tim valik** = löf obik lü ol dabinon **nenzediko (nenropiko)**

mun **ai** logädikon te ön flan bal = mun **laiduliko** logädikon te me flan bal = pö tal kanoy logön te flani bal muna

tal **ai** golon (tulon) züo sol = tal **nenropiko** golon (tulon) züo sol
sol **ai** löpikon tö lofüd e donikon tö vesüd = sol **föro** löpikon tö lofüd e donikon tö vesüd

Neai

Ladvärb „neai“ koboyümavöd vödäs ‚ne‘ + ‚ai‘ e jonon das jen jenon nonikna:

vif alik **neai** *kanon* pluön vifi lita = vif alik **no** *kanon* pluön vifi lita

pö stip alik

sol **neai** löpikon tö vesüd = sol **neföro** löpikon tö vesüd

Ai laidio

Vöded „ai laidio“ jonon das dun dulon nenfiniko, no ufinikon:

efilöfob oli **ai laidio** = *efilöfob* oli ed *olöfob* oli **jü laidüp**

Ai neplu

Vöded „ai neplu“ jonon das dun *nenzediko nepluikon*:

nu mens reidons **ai neplu** = mens anu reidons **neplu ka** mens **bü yel bal**, kel reidons **neplu ka** mens **bü yels tel**, kel reidons **neplu ka** mens **bü yels kil**, e ret ... = mens reidons *ün tim alik* **neplu ka** mens **büo**

Ai plu

Vöded „ai plu“ jonon das dun *nenzediko pluikon*:

if oseitoyöv turno stonis ini kum, mafot (gretot) uta ovedon **ai plu** = if oseitoyöv stoni ini kum, ut ovedon **ai gretikum**

Aipo

Vöd ‚aipo‘ jonon das jen semik jenon *pos jen alik*:

aipo del (alik) neit jenon = **pos** del **alik** neit jenon

dabükots gaseda at papübon **aipo** *dels vel* = dabükot nulik

gaseda at papübon **a** *del vel* = gased at papübon *alvigo*

Aipos

Vöd ‚aipos‘ jonon das jen semik jenon *pos jens valik*:

ukömob **aipos** votikans = ukömob **pos** mens **valik** votik =

ukömob as lätikan

Sevols-li, das ... Ficiyuäns



1) Ficiyuäns binons län in Seanop e binädon me nisuls 333 ab te za tumdeg onas binons pebelödöl. Ä te nisuls tel labons (kö dötums 87 lödanas lödons) levegis toodik. Veigöm pöpedikün binon bot.

2) Ficiyuänans göliküno pö tal primikons deli nulik. Atos binon sekü das nisuls pladikons su sonemik „lien votikama dätas“ teilöl voli lü dils tel in kels tim distidon mö del (düps 24).

3) Ficiyuäns binons län bal nemödikas kö spot netik binon el ‚rugby‘. Ön mödot lödans mö mils 850, mans plu tummil pledoms oni.

4) Ficiyuäns ünü yels 150 lätik ivotikons nemi okik lulna.



5) Ficiyuäns idagetons libi de Britän ün yel 1970 ed äbinon bal kolunanas vönädikün ona.

6) Demü nelab vata flifik Ficiyuänans zänädons vati reinik se nuf ini cubs jäfüdik.

7) Pö Ficiyuäns te dugals topik kanons lenlabön lünätis e hätis soliks.

8) Ficiyuäns binons motedalän svimana jiel ‚Caroline Puamau‘.



Lerät

Tuvedot leräta se nüm büik:

Cal ladetäba binon dilekan musigalefa.

Ekö, vödem peneda dilekane Lamerikänik hiel ‚Leopold Stokowski‘:

"O, mastan cädik! Äbinob pö konsärt orik. Notükön ore dani stedälik, ab otdüpo mutob sienön, das söl bigik jofik pläyöl me musigöm nidik, dil kela mufon usio ed isio, äpläyom te ven logetor oni. Ünü tim votik äseadom te ed ädalilom pläyami kompenanas okik...".

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».